




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIFEFA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le Faaipoipoga ma le Faapouliuli

(Pepa mo le Fono Tele 2016)
saunia e le

Susuga Peteru Tone FT
(Faafegaiga Vaivase-tai)

Ma lo'u ava tele ou te tula'i atu ai
ma lo'u faaaloalo i luma o lou tou

O le Falaoa o le Ola

O le Atua Na Te Fafaga Lo'u Agaga
Ioane 6:35: "O a'u nei le areto o le ola."
O le *silasila itulau e 11*
Matuaaga o le Pese:

My Country, 'Tis of Thee

O lagona naunauta'i ina ia
ia tusia se viiga o le Atua e fai
ma vii a tagata Amerika e vivii
faaauau itulau e 12

Fai Mai e a Salamo e 127-128 e Uiga i le 'Aiga - (Family)?

O le Salamo e 127 ma le 128 o
loo tau fai tautala mai e uiga i le
aiga (family). Ui i lea, o loo iai ni
mea e tatau lava ona faaeteete iai
ina ia 'auna ne'i faanenefu lo latou
faaauau itulau e 12

mamalu. Faafetai tele i le mamalu
o le Laulau o le Komiti a tama o
le Ekalesia, i lau tou faaaloalo ua

saunia se pepa mo le tauaofia o le
Fono Tele i lenei taeao.
faaauau itulau e 2



Fanau a le Ekalesia ia latou faafiafiaga e masani ona fai i
Fono Tele, ma e na faafiafia latou nei i le Fono Tele 2012

Mo Tupulaga Talavou

Se'i Vaai Pe Se a Se Mea e te Mafai ona Fai

O le pepa o loo tautau i lo'u ua fai
mai: "P.E.Exempt". O lona uiga
o le tagata lea e 'asoaina le pepa
lea, e taga ona le auai i le piriota
faamalosi tino ma taaloga, ona o

ni faaletonu i lona tino.

Na ou 'etu'etu atu i se fale i le
malae o le a'oga Eastern Wash-
ington State College. 'Etu'etu!?
silasila itulau e 8

O le Faaipoipoga ma le Faapouliuli

mai le itulau muamua

Ou te faamalulu atu, pe afai e le oo le taua o le manatu faamamafa o lenei pepa, i le maualuga moomia o loo faatali iai lenei aofia mo se sauniuniga e faaoga iai lenei taimi taua o le Fono Tele i lenei taeao. Ona pau lava o le manatu ua ou filifilia, ua faailoa mai e le “Vaaiga i le Agaga o le Atua”, ua fai iai se manatu i lenei taeao.

O se taumafaiga faa-faifeau Tausi Nuu e vaai i le eseese o ia mea e lua, ma mafaufau foi poo fea le mea o loo faaali mai e le Agaga o le Atua, o lona finagalo i nei mataupu. Ma ono faaosofia ai foi ni lagona pe faapefea ona tatou faatulaga a tatou fuafuaga ma mea faatino. Ia tusa ma faavae ua faaali mai e le Atua ia i tatou i le Tusi Paia.

O le Faapouliuli, o se upu ua ou faaaogaina e faatatau i se toalua e nonofo faatasi faaulugalii ae le faaipoipo. O le uiga lena o loo faaaogaina ai le upu Faapouliuli i le pepa. O se mea i la’u maitau faa-faifeau ua agai ina tupu tele, ma fiafia iai le toatele, ma ua faasolo ina le manatu mamafa iai nisi, i lona faatinoina. Ma o le fesili, pe o le a se upu a le Ekalesia Kerisiano i lea tulaga?

Tatou mafaufau atili pea - Pe le’i faigofie tele ‘ea ona tatou ioe i le lalolagi i nei mea? Ua oo ina le faigofie ai ona tatou iloa le tulagaese o le feau faa-perofeta a le Ekalesia e tatau ona ta’u ma faaali atu i le lalolagi? O le a se ‘Vaaiga i le Agaga o le Atua’, ma se faaaliga mo tagata lotu i le uiga o nei mea i nei aso? E faapefea ona tatou iloa le eseese o le Agaga o le Atua ma le agaga o le pouliuli?

Ua faasolo lava ina toatele tagata lotu e faatinoina lea tulaga ma le lotu lelei i nei aso. E leai so latou

manatu e iai se mea o faaletonu i mea o loo latou faatinoina - o le nonofo faatasi faaulugalii ae le faaipoipoina. O le a le tatou vaai faale-agaga i lenei mataupu? E faapefea ona tatou iloa le eseese o le Agaga o le Atua ma le agaga o le pouliuli? E faapefea ona tatou iloa le mea e sili atu ona lelei, o loo faaali mai e le Agaga ia i tatou? Ia, e tofua a le tagata ia ma lana vaai i faaaliga a le Agaga ia te ia. Ae i lo’u manatu, a tatou fia iloa foliga o le Agaga Paia o le Atua, ona tatou vaai lea ia Iesu. E moomia tele lo tatou vaai ia Iesu, aua e tele le mau agaga; e tele foi le mau agaga faafoliga e faaseseina gofie ai i tatou. Peitai, poo le a lava le ituaiga agaga, a le foliga ia Iesu, o lona uiga o le agaga ese. O le fua faigofie lava lea e iloa ai le Agaga Paia i le tatou vaai - o Iesu. A le foliga ia Iesu le Agaga o loo gaoioi i le “Faapouliuli”, o lona uiga o le agaga ese. Ma e le o faaaliga ma foliga na o le Agaga o le Atua o loo faaali mai ia i tatou i le Tusi Paia, i lenei mataupu.

O le Pepa, o se taumafaiga e faamatala faale-Tusi Paia le uiga o le faaipoipoga, - ma o loo ou taumafai e tuu faafeagai ma le le ‘ato’atoa o le faapouliuli. Ma ou te faamaulalo atu, o nai au faamatalaga o mea e lua, o loo lava i le malamalama’aga faa-Kerisiano e pei ona faaali mai i le Tusi Paia. Faatasi ai ma nai lagona faa-faifeau e tutupu mai ai. E le o oo lava se sailiga o nei mataupu i se faamatalaga o le faaipoipoga i ona itu eseese faaleaganuu, faapena foi ma le faapouliuli. Ae ua na o ni manatu lava faavae i le Tusi Paia o loo taumafai e faamatala ai mea e lua. O lona uiga e faigofie lava le mataupu.

O LE FAAIPOIPOGA:

O le Faaipoipoga, o se mea ua talia ma faatulafonoina lona faati-

noga i sosaiete o tagata soifua. Peitai, e le o se mea na foafoa ma amata e tagata. O le a’oa’oga faa-Kerisiasno i lenei mataupu, o le faaipoipoga, o le mea mai le finagalo o le Atua, ae le o le tagata na amataga ai. Pei ona fai mai le Tusi Failotu - IA VIIA LOU SUAFA -

“Ua tatou talitonu, o le Faaiipoipoga, o le meaalofa lea mai le Atua ina ia atina’e aiga e tusa ma lona finagalo ina ia manuia lana fanau. Ua tatou manatua, sa ‘auai Iesu Keriso i le Taumafataga i Kana i Kalilaia, ma e pei ona ‘oli’oli lo tatou Alii i lena aso..... ua faapea foi ona tatou olioli i lenei sauniga pa’ia (itulau 67, Lomiga Muamua 1963).

I nei ala, ua faatulaga lelei ai e le Atua, ma talia, ma na faamamalaina le Faaipoipoga. E moni na te valaauina nisi e soifua le faaipoipo, ae nonofo toatasi i lenei olaga pei ona fai mai le Evagelia a Mataio - ‘A ua fetalai ia ia te’i latou, e le mafai ona talia lena upu e tagata uma, ua na o e ua foa’iina atu iai. Aua, o iai eunuka o e faapea ina fanau mai. O iai foi eunuka o e ua faaeunukaina e tagata; o iai foi eunuka o e ua faaeunukaina i latou e i latou, ona o le malo o le lagi. Ai se na te mafaia ona talia, ina talia loa e ia. (Mataio 19:11

Fai mai le Tusi Paia, i le isi lalolagi fou, pe a uma le Toetu, o le a faamutaina lea tulaga.

“Aua pe a latou toe tutu mai i e ua oti, latou te le fai ava pe nofo tane ae peitai latou te faapei o agelu oi le lagi.” (Mataio 12:25).

Ae ui i lea, a o faagasolo pea le lalolagi o loo tatou iai, poo le a le umi o le a iai, e tatau lava ona faamamalaina e tagata uma le Faaipoipoga. Fai mai le Tusi Paia, o i latou e taofia tagata e ‘aua le faaipoipo, o faiaoga sese, o e ua faaseseina e agaga tau fase.

faaauau itulau e 5

O LE LAUGA

Tusi Faitau: 1 Korinito 15:51-58

Matua: 1 Korinito 15:58:

“O lenei, ou uso pele, ia outou tumau, ma le le faaga’etia, ia alualu lo outou faamalosi i le galuega a le Alii ma le le aunoa, ina ua outou iloa, e le se mea faaleaoga lo outou tautiga i le Alii.”

O le mataupu lenei, o le mataupu o le toetu o e ua oti. O le mataupu e faamanatu mai pea ia i tatou, e tatou te ola, ae o lo tatou lava i’uga, o le oti. Poo le a lava le faalagilagi e faamatala mai ai, poo le oti, maliu, tuumalo, usufono, gau le tootoo, solo le fue, gasolosolo ao, taape papa, pa’u le masina, po le nuu, to le timu, gau olosaa, tafea le tau’ofe, poo a lava le mau upu tatou te tau afeifei ai le faigata o le oti, e tasi lava lo latou uiga faigofie - oti.

A gauolosaa - oti

A taape papa - oti

Po le nuu - oti

To le timu - oti

Pa’u le masina - oti

Tafea le tau’ofe - oti

Aisea tatou te tau afeifei ai i nei mau upu, ma nei mau faaupuga, lenei mea, o le oti?

Aua fo’i leaga le mea e le popoi. Leaga le mea e le alofa.

Le tama sa ta alofa iai. Le tina sa alofa ma na tausia tamaiti. Le atalii ma le afafine na fanau i lo ta manava ae maliliu talavou. Le to’alua ma le tina o tamaiti sa faananau iai, ae a oo mai le oti, e fiu lava i tau afeifei i le gasolosolo o ao ma le taape o papa, a ua oti. Uma le ola! Motusia mafutaga! Malepe fuafuaga ma moomooga sa fai. Tatou te soifua i le lalolagi nei, ae sea sea ona tatou manatua, tatou te feoti uma lava. Tatou te manatu lava, e oti isi tagata, a o tatou, e leai, e le’i taitai ona oo

mai le oti. Aemaise lava tupulaga talavou ma le malaulau o le ola. Poo tagata e malolosi lava latou pe le maua i ni ma’i. E mamao lava le oti ma o latou mafaufau. Ae iai taimi e faate’ia ai tatou, ma faatepa lelei atu tatou i lo tatou iuga, o le oti, ma faamanatu mai ia i tatou, o le olaga lenei, e iu uma lava i le oti.

E le faatali foi sei o tatou sauni ona oo mai lea; pe sei o tatou maliilie iai, ma se’i sa’ili ni tupe ma ni toga, ni pusa’apa ma nisi mea.

E le’i iai se isi na manatu o le a maliu talavou Marilyn Manroe i le 1962, poo Princess Grace o Monaco i le taavale, poo Princess Diana na maliu ae na o le 36 o ona tausaga. A o upu o lauga fai mai, ‘e faata’oto le lagoon’ele, e ‘oto foi le moemoe!

Tatou te tau fesilisi foi, pe aisea e faatigaina ai e ma’i le tagata o le a oti, ma ulufale atu i le manuia. Aisea e le savali atu ai i se ala e alalaga fialia ai tagata ma pepese i viiviiga o le Atua aua o lea o le a ulufale atu i le manuia, ma fialia ai foi ae le maua i ma’i tiga, ma’i leaga, ma oti ai?

Peitai o tatou ua talia le maliu tiga o lo tatou Faaola i luga o le satauro, ma tatou talitonu ma faatuatua i le taulaga pa’ia na ia faia mo lo tatou faaolataga, ma lona toe tu manumalo mai le tuugamau, o lo tatou toe tutu manumalo faatasi lava lea ma ia mai le oti, ma le tuugamau, ma tatou alalaga faatasi ma lo tatou Alii Faaola, “Le oti e, o fea o iai lou tui; le tuugamau e, o fea o iai lou manumalo.” Aua ua oo mai le oti ona o le tagata; ua oo mai foi le toe tu o e ua oti ona o le tagata, o Iesu lea. Aua faapei ona oti uma ia Atamu, e faapea foi ona faaolaina uma ia Keriso. O le ‘a’ano lea ma le ute o lo tatou faatuatua. E pei ona fai mai le Ioane 3:16: “Aua ua faapea lava ona alofa mai o le

Atua i le lalolagi, ua ia aumai ai lona Atalii e toatasi, ina ia le fano se tasi e faatuatua ia te ia, a ia maua e ia le ola faavauvau.”

Ma le Ioane 15:13: “E le sili lava le alofa o se tasi i lenei alofa, ia tuuina atu e se tasi lona ola mo ana uo.”

Ua fiu se tasi faifeau e tatalo, i le taimi a o o’u talavou, ina ia alofa mai le Atua ma faamalolo le ma’i o lona atalii, ae na i’u lava ina oti le tama. Ona tagi lea o le faifeau ma fai mai, e le toe talitonu i le Atua. Aua, i lona manatu, afai o le Atua e **omniscient**, ma **omnipotent**, o lona uiga e mamana ma malosia ma e i iai i soo se mea, aisea ua le tali mai ai i lana ‘ai’oi ma loimata ona o le tigaina o le ma’i o lona atalii, a o lea lava e afio ai le Atua i le mea o iai lona atalii?

Na ta’u mai e nisi le tatalo ma mafatiaga o le faifeau e ona le atalii, ia Tapeni Ioelu sa faifeau i Apia. Ona alu lea iai o Tapeni ma faamafanafana i le faifeau ma fai iai: Ina ua iloa e le faifeau faia’oga o Fiti sa pule i le a’oga a Maluafou i le 1948, e i’u i le oti lona ma’i, ona tatalo ai lea faapea: “Iesu e, sa e fia ola foi oe, ae faapefea le finagalo o le Atua?” Ona faato’a faamafanafanaina ai lea o le loto mafatia o le faifeau.

A tula’i mai mea e ono tofotofoina ai lo tatou faatuatua, tatou loto tetele, ma tatou fialia ma olioli, aua na toe tu manumalo mai lo tatou Faaola. O la tatou tatalo, ia maua foi e isi lenei manuia, ua tatou maua mai ia Keriso Iesu.

“O lenei, o’u uso pele e, ia outou tumau, ma le le faaga’etia; ia alualu lo outou faamalosia i le galuega a le Alii ma le le aunoa, ina ua outou iloa e le se mea faaleaoga lo outou tautiga i le Alii.”

Afemata T. Apelu Aiavao

(E le’i taunuu mai le lauga na faatonuina.)

Taulaga Faapitoa mo le Iupeli -2016

Meaalofa Mafutaga Tina Aoao mo faamalama.....	824,150	Rev. Opapo ma Luisa Soanai.....	1,000
Meaalofa Mafutaga Tina Aoao mo faalo.....	227,577	EFKS Siufaga Falelatai.....	2,000
Mafutaga TPT.....	500,000	EFKS Pata Falelatai.....	2,000
Meaalofa Sosaiete LMS.....	20,000	Rev. Caesar ma Sarena.....	1,000
EFKS Lalomalava.....	3,000	EFKS Fagafau.....	1,000
EFKS Samata i Tai.....	2,000	Rev. Tunumoso Iosia.....	3,000
Rev. Aukuso ma Tofai Taumate.....	1,000	EFKS Luatuanuu.....	1,000
Rev. Enefatu Lesa ma faletua.....	2,000	EFKS Faleasiu.....	2,000
EFKS Puleia.....	2,205	Rev. Palemia Tauiliili ma EFKS Samalaeulu	2,000
EFKS Sala'ilua.....	5,000	Rev. Piilua Sao ma EFKS Lepuia'i.....	2355
Rev. Tuitoga Leota ma Silika..	1,000	EFKS Apia Uta.....	5,000
EFKS Faleseela.....	2,000	Rev. Eric ma EFKS Fasitootai.....	3,000
Rev. Mapu ma Tafa.....	3,000	EFKS Alafua.....	1,000
Rev. Kaleve Leifi ma EFKS Saipipi.....	3,400	EFKS Vaitoomuli.....	5,000
Rev. Alofa ma EFKS Luua.....	1,000	Rev. Auvaa Peseta ma EFKS Leufisa.....	2,000
Rev. Lafolafo ma EFKS Saasaai.....	1,000	Rev. Faasavala ma EFKS Faiaai.....	1,000
Rev. Faataualofa ma EFKS Asaga.....	1,000	EFKS Faleapuna.....	1,000
Rev. Feterika ma EFKS Lano.....	1,000	Kolisi Malua.....	11,880
Rev. Aperaamo ma EFKS Pu'apu'a.....	1,000	Rev. Eti ma faletua.....	1,000
Rev. Leaso Tupai ma EFKS Gautavai....	10,000	EFKS Lotofaga Aleipata.....	2,000
Rev. Utufua ma Taiaopo Naseri.....	2,000	EFKS Frankston.....	1,000
EFKS Apia.....	10,000	Rev. Iakopo ma Lemafoe Pesaleli.....	1,000
Vaelua Sene ma faletua.....	5,000	EFKS Hutt Valley.....	6,050
Rev. Leauma Faletoese ma EFKS Falealupu	3,000	Pulega a Melepone.....	1,000
EFKS Tafua Tai.....	2,000	Elder Apelu Amosa.....	500
Rev. Fili Sia ma faletua.....	1,000	EFKS Clayton.....	1,000
Rev. Viliamu Finau & vasega faau 1996	2,000	Rev. Fatu ma Tualele.....	500
Maria Poasa.....	1,000	Rev. Elder Viliamu ma Nellie Finau.....	1,000
Lemamea Ropati ma Elisa.....	5,000	EFKS Dandenong.....	1,000
EFKS Faala.....	1,000	Mafutaga Tina Pulega Melepone Saute....	1,000
EFKS Vaisala.....	1,000	Pulega Melepone Saute	2,000
Rev. Tanielu Mamea ma Pulega Manukau Sisifo	10,000	EFKS Hamilton.....	3,000
EFKS Vailoa Palauli.....	5,000	EFKS Sili.....	2,000
Toeaina Penisione Seuga Pula ma Tupe....	1,000	EFKS Fasitootai.....	10,000
EFKS Tanoaleia.....	5,000	EFKS Sapapalii.....	2,541
Sapini Eteuati.....	200	EFKS Waimanalo.....	1,000
Rev. Solinuu Paiaaau ma EFKS Patamea	1,000	Rev. Apelu Pula.....	1,000
Rev. Simalu ma faletua.....	1,000	EFKS Matautu Falelatai.....	12,200
EFKS Taga.....	2,000	AOFA'IGA:	1,768,558

O le aniani ua igoa o Onyanga, ua faaigoaina fo'i o le aniani o le toafa, e ola i Angola i le toafa o Namibia. O le laau sosolo e ona lea fua e oo atu i le 2,000 tausaga o ola.

A steward came to the preceding elder and asked for a preacher. "How big a man do you want?" asked the elder. "I do not care so much about his size," said the steward, "but we want him to be big enough to reach heaven when he is on his knees."

O le Faaipoipoga ma le Faapouliuli

mai le itulau e 2

“Ia faamamaluina le Faaipoipoga e tagata uma, o le moega foi o le ulugalii ia leai sona leaga, aua e faamasinoina e le Atua o e faitaga ma e mulilua.” (Eperu 13:14).

Faapea foi ma le Timoteo 1:

“A o loo ta’utino mai e le Agaga, e o ‘ese nisi i le faatuatua i tausaga amuli, latou te faalogo i agaga e faasese ma a’oa’oga a temoni, ona o le pepelo o tagata tala pepelo..... Latou te vavao le Faaipoipoga ma faasa isi mea’ai, o mea lava ua faia e le Atua ia talia ma le faafetai e i latou ua faatuatua, ma latou iloa le upu moni.” (1Timoteo 4:1)

O le mea la, o le Faaipoipoga, o se poloa’iga mai le Atua i le Foafoaga, ae le’i pa’u le tagata, ma e tatau ai ona tatou manatu i le Faaipoipoga - o se meaalofa matagofie a le Atua mo le fanau a tagata.

O loo mulimuli lava le mataupu silisili o le Faaipoipoga i faaaliga o le Agaga o le Atua i le Tusi Paia, o loo faatulaga mai ai faamoemoega e tolu na faavaeina ai e le Atua le faaipoipoga, i le Kenese muamua ma le lua. Muamua - o le tane ma le ava sa poloa’iina ia uluola ma fanafanau.

“Ua faamanuia foi e le Atua ia te’i laua, ma ua fetalai atu ia te i la’ua, ina fanafanau ia, ma ia uluola, ma ia tumu ai le lalolagi (Kenese 1:28).

O le maua o fanau o loo muamua i le lisi, e aofia ai ma lo latou tausiga i le alofa ma a’oa’iga faale-aiga. O lona lua, ua fetalai le Atua - E le lelei mo le tane le nofo na o ia. O le a ou faia se fesoasoani mo ia.

“Ua fetalai mai foi le Alii le Atua, e le lelei ona toatasi o le tagata, ou te faia sona fesoasoani e tatau mo ia.” (Kenese 2:18).

O lona uiga, o le faamoemoe o le Atua mo le Faaipoipoga, e mo le manuia o le Sosaiete o tagata soifua. Ina ia talia e le tasi le isi,

ma faamafanafana le tasi i le isi, ia le gata i taimi o le solo lelei, ma taimi foi o le faale-lelei.

O lona tolu - O le faamoemoe o le Faaipoipoga, o le ofoina atu o le tasi i le isi i le alofa ma faatino ai i le nonofo faatasi faaulugalii, ia poo le avea ma tino e tasi.

“O le mea lea e tuua ai e le tane lona tama ma lona tina ae faatasi ma lana ava; ona avea ai lea o i la’ua ma tino e tasi.” (Kenese 2:24).

O nei mana’oga o le Faaipoipoga ua moomia lona faamalositia i le pa’u o le tagata. O a’oa’iga alofa i totonu o le aiga, ua moomia atili, ona o le soifua soona fai o fanau. O le lagolago faaleaiga, ua moomia tele, ona o fesootaiga malepelepe, ma le malosia o le tiapolo. Faapena foi i fesoota’iga faaulugalii, ona o le malosia o faaosoosoga i le faitaga. Peitai, o nei faamoemoega e tolu, sa iai lava a o le’i pa’u le tagata. Ma, e taua lo tatou vaai iai o se vaega o fuafuaga alofa a le Atua mai le amataga, e saunia ai le faavaeina o le Faaipoipoga.

O le maua o le tatou vaai i le faamoemoe o le Atua i le amataga o le Faaipoipoga ma le aiga, o le atili ai lea ona mata’utia le tulaga o le tete’a o se ulugalii pe a oo iai. O le malepe o se Faaipoipoga a se ulugalii, o se mala faigata lea. Aua e faavaatu’ia ai le faamoemoe o le Atua i le Faaipoipoga. E oo mai ai i le tane ma le ava, tiga matuia o le tete’a’ese, le mautonu ma le mafatia i lagona sese, ma afaina ai foi ni fanau i lagona fenumia’i, ma le le fiafia, ma le ita.

O le faamatalaga lata mai a le Tusi Paia i le uiga o le Faaipoipoga o loo i le Kenese 2:24, lea sa faaoga e Iesu, ma na siitia mulimuli ane o le upu a le Atua, ina ua fesiligia o ia, pe taga ona faate’a o le ava.

“Ona tali atu ai lea o ia ia te’i latou. ‘Tou te le’i faitaulia’ca, o le

na faia tagata i le amataga, na ia faia i la’ua o le tane ma le fafine.. Na ia fetalai ane foi, o le mea lea e tuua ai e le tane o lona tama ma lona tina, ae faatasi ma lana ava, ona ‘avea lea o i la’ua o le tino e tasi.” (Mataio 19:4-5)

Ina ua uma ona faia o Eva, ma aumai e le Atua ia Atamu, ma talia i le olioli ma le fiafia e Atamu, o lana ava na aumai mai le Atua. Fai mai le faamatalaga a le tusitala - O le mafuaaga lea e tuua ai e le tane lona tama ma lona tina, ae faatasi atu i lana ava, ma ‘avea ai i la’ua ma tino e tasi. I le tulaga lea, e mafai ona tatou manatu ai, o le Faaipoipoga, o se mea lava sa i le finagalo o le Atua, ia tuua e le tane ona matua ma le lagona, e le na ona nonofo eseese ma i la’ua, ae ia faatasi atu i lana ava ma avea ma tino e tasi ma ia. O le faailoga o fesuaiga o fesoota’iga faa-tagata (o le tamaitiiti i ona matua) i le isi sootaga o le tane ma le ava. O lona uiga o le Kenese 2:24, o loo aliali mai ai, o le tasi i le Faaipoipoga o se fesoota’iga patino lava i le va o le tane ma le ava. Ma o leni fesoota’iga, ua faalauiloa i se sauniga fai faatasi. O lona uiga, o le faamatalaga a le Tusi Paia i le mea e igoa o le Faaipoipoga - o se feagaiga osia faapitoa lava i le va o le tane ma le fafine, ua faatau-nuina ma faamaufaailogaina e le Atua. Ua tuua aloa’ia ai matua, ma faasolo ai i fesoota’iga faaulugalii, ma faatino ai i fesootaiga felagolagoma’i, ma taualuga ai i le maua o ni meaalofa o fanau.

Suiga o le Vaai a Tagata i le Faaipoipoga

O loo molimauina e nisi o loo aga’i pea i luma le numera o ulugalii faaipoipo e tete’a, ma e tele lava mafuaaga e pogai ai ona tete’a ulugalii, mafuaaga e aofia ai tupe

faamatalaga e 10

(George Fox: 1624-1691)

O SIAOSI FOSI O LE NA IA FAASA'OLOTO LE AGAGA

O Lana Faaaliga e Tolu: “O Fale ma o Latou Tumutumu Uumi” (steeples)

Sa faaauau pea ona talanoa Fosi i ona matua ma lona aiga e uiga i ana faaaliga (revelations), ma lona faamoemoe e oo ina tosina mai latou. Peita'i, latou te le'i taliaina ona talitonuga ia, a ua faaauau pea ona latou lagona le le fiafia ona o lona save'ua o le filemu i lo latou nuu. Na lagona lava e le faifeau a le aiga le lamatia o ia ma lana galuega e Fosi, ma ia matua faitioina o ia i ona matua, ma fai iai o le la atalii o se tasi o talitonuga fou ia ua fai mai ua latou maua se malamalama fou tau i mea moni ua leva.

Ua tuto'atasi nei Fosi mai lona nuu, lona aiga, ma ana uo. Ae le'i faavaivai ai Fosi ona o le mamafa o le tetee mai o tagata, a ua faaauau pea ona ia aga atu i le mea o iai le finagalo o le Atua, ma sa'ili ia te ia i aso uma, ma faalagolago i le Agaga Paia e faaali mai le mea moni.

O lana faaaliga lona tolu, e pei foi o ana ulua'i faaaliga e lua, e le'i taliaina e talitonuga lautele o le nuu.. I le vai taimi lea, sa iai le manatu o tagata, o le falesa o se nofoaga pa'ia, e le pisa ai nisi ae tau musumususu, ma laalaa filemu ae 'aua le pisa ona o le mea lea e afio ai le Atua.

Ae 'ese ai le talitonuga o Fosi. Ona o loo fai mai le Afioga a le Atua, e le mana'omia e le Atua se fale. O lona malumalu o le 'a'ano lea ma le toto o tagata faatuatua, o e ua latou molimauina le toe fanau-fouina, ma latou vaavaai atu i le Agaga Paia mo lana ta'ita'iga. Sa talitonu Fosi o Kerisiano moni o i

latou ia o le Ekalesia faale-agaga, ma o o latou tino o malumalu ia o le Atua. O le mea lea na ia amata ai ona faaigoa falesa o “Fale ma o Latou Tumutumu ‘U’umi”, o se muagagana i ia aso. Na avea lea ma mea e matua tiga ai loto o le 'au lolotu ma mapo lotu. Ae na avea foi lenei uiga o Fosi ma mea na matua sauaina ai o ia, ona o falesa na fauina foi i luga o talitonuga o tagata i le Atua.

O Lana Faaaliga Lona Fa: E A'oa'o le Agaga Paia.

E faavae le faaaliga lona fa i luga o le faaaliga lona tolu: O le Alii o le a ia a'oa'o e ia lava ona lava tagata. Ua tatalaina e Fosi le misiona a le Agaga Paia aga'i i Ekalesia mamate o loo latou faaogaina le Afioga a le Atua, e aunoa ma le Agaga Paia. O le talitonuga o Fosi, e tatau ona faalagolago le tagata i le faamalamalamaina, (faaaliga), mai le Agaga Paia, ae le na o le faalagolago i le faaupuga o loo tusia i le Tusi Paia. O le maamaai o lana vaaia i nisi o fuaiupu e mafua mai le Agaga Paia o loo ia te ia, lea e mafua ai ona manino lelei ma malamalama ai.

Ua amata ona malamalama Fosi i le tatau ona filo faatasi le Agaga ma le Upu. Ona avea ai lea o le Tusi Paia ma mea faafiafia, e tumu i mea ofoofogia, o loo iai tali ma avanoa. Na malosi lona manatu e faapea, e pei lava ona maliu Iesu Keriso mo tagata uma, o le mea foi lea, o le Agaga o le Atua ua avanoa e a'oa'o i tagata uma, ae le na o le aufaigaluega a le Atua. Sa talitonu foi o ia, o ta'ita'iga uma a le Agaga Paia, e mafai ona

faamaonia e le Upu.

O lenei faaaliga o se mea fou lea i ia ona po i itu nei e lua. Muamua, ua faaaliga manino e faifeau e faapea e na o i latou lava e mafai ona latou faaliliu pe faauigaina le Tusi Paia, ma sa latou faaogaina lea uiga faafia amiotonu e pulea ai e pei o se samala i luga o ulu o tagata, ma faamalosi ai i latou e faia, pe ola, i soo se mea e fai mai ai faifeau.

O lona lua, ona ua faavasega tagata i ituaiga poo vaega. O le uiga o lea mea, e oo mai i lea taimi, o le vaega pito maualalo o tagata nuu, e laitiiti lava se latou avanoa e tautala ai i pulega o le nuu, ma sa manatu mama lava iai faifeau ma tagata taua o le nuu. A o le faaaliga a Fosi, ua faamaonia ai, o tagata ta'ito'atasi uma lava, tusa lava pe o le a lona tulaga i le nuu, e avanoa e na te maua se feau mai le Atua, ma a'oa'oina o ia e le Atua.

E le taumate ua e malamalama i le mea o taumafai mai iai Fosi, o loo tautala o ia e le gata o le pulega faalelotu i ona aso, a o tulaga mamalu faale-nuu. E pei lava o isi tagata Toe Fuata'ina, e le'i mana'o o ia e nofo na o ia i se tulimanu, ma aafia ai na o ni tagata to'aitiiti e pei o ia.

Aumai ia te A'u le 'Au Muimui, i Latou ua Faaseina, ma le 'Au Loto Vaivai

E pei lava foi o Luteru ma Kalavini, na talitonu foi Fosi, o le Ekalesia e pei o se fanua e faafailele ai laau toto. O lona uiga o le fanua e faafailele ai le 'au faatuatua. Ae na sili atu i luma le mea na fai e Fosi, ona na ia lagolagoina ni tama'i vaega sa ese o latou manatu i mea e talitotnu iai le lotu.

O le tausaga e 1646, na toe malaga solo ai foi o ia, ma oo atu i tama'i aulotu laiti ia, ma lauga iai ana faaaliga e pei ona ulua'i ta'ua. Na faalototeleina lava i latou, ona e
faaauau itulau e sosoo ai

(George Fox: 1624-1691)

O SIAOSI FOSI O LE NA IA FAASA'OLOTO LE AGAGA

mai le itulau e 6

lauga Fosi e pei lava o se tasi o ia te ia le pule, ma tali fesili mai o latou loto, fesili tau i mataupu tau faiga malo faapea mea faale-agaga.

O lea faiga o le asiasi atu i au-lotu e tetee pe ese nisi o o latou talitonuga, e matua le fiafia lava iai galuega faa-ekalesia i nei aso, e pei lava foi ona iai i aso o Fosi.

O le mea na manuia ai le taumafai a Fosi, ona na te le'i su'eina faifeau o siisii i luga o latou tulaga. E le'i fiafia o ia i tagata e taumafai i tulaga tofi, faalelotu pe faafaiga malo. Ae na ia saili le 'au muimui, i latou ua faaseseina, ma i latou e loto vaivai. Ma e sa faigofie ona ia maua i latou ia, ona o lona agaga, sa mulimulita'i i le Atua. Ua oo ina mautinoa e Fosi e le mafai ona tali pe faalelei e le tagata ia mana'oga o lona agaga.

A o saili o ia i se tasi e fai ma ona faia'oga, ae ia faalogoina le musumusuga a le Agaga o le Atua o fai mai, "O loo iai o Ia, o Keriso Iesu lava lea, e mafai ona musumusu atu i lou loto."

Na ia mautinoa e na'o Iesu Keriso lava e mafai ona tautala i le loto o le tagata, fai suiga, ma tuu iai le malosi faaleagaga, ma 'ia na o Ia e avatu iai le viiga.

O lea faaaliga na avea ma mea e pulea lana galuega i aso uma o lona ola, ma ia le taumafai ai e faamalieina tagata uma, pe saili foi i ni ona viiga.

E na te maua loa se tala i se faatasiga o le a faaali ai manatu feteena'i o tagata, e le mafai ona ia le auai, ma ia faaaogaina ai lea avanoa, mo le Tala Lelei. E faalogologo lelei ia latou faitioga ma finaiga, ona avatu ai lea o sa

na tali e faavae i luga o le Upu ma le Agaga. Na faamalieina loto o tagata, ma malamalama lelei ai i se mataupu.

O se tasi lenei o lesona aoga na faamanino e Fosi. E ui lava o mea na tautala ai e le'i oo iai ia auga tupulaga, ae o ia lava o se tagata e malamalama lelei i lana auga tupulaga. O se tagata sa militino ma lana aganuu ma ia malamalama lelei iai. Ou te manatua ai Tavita, e pei ona faamatalaina i le Galuega 13:36: ".....ina ua uma ona auauna i le finagalo o le Atua i lona lava tupulaga...."

O Fosi e le o se Kerisiano e pumoomoo lona olaga. E ui lava i ona uiga aliali e iloa ai o ia o se tagata pa'ia, e le'i fefe e femili ma le lalolagi, pe faapito sona fiafia ia i latou e tutusa o latou talitonuga ma ia. E le maua se Toe Fuata'iga mai ni tagata e faapea ni o latou uiga. Leai. Sa tulituli lava e Fosi tagata, ma ta'ita'iina mai i latou i le Atua, ma, i lea lava taimi, taumafai e fo'ia pi'opi'o ma faafitauli o le nuu. Na talitonu lava o ia o ona tiute pa'ia ia mai le Atua. Ma sa lauga o ia ma le le fefe e pei o se agelu.

Ou te talitonu o tagata Toe Fuata'iga iloga uma, sa latou iloa lelei ona latou faaaogaina le pule ma le fe'au sa ia i latou, i soo se ituaiga lalolagi - polokiki, o aga fesoota'i, ma le itu faaleagaga. Aua fo'i, o le Tala Lelei e tataua ona fo'ia mana'oga o tagata, ma o ia foi mana'oga e aafia i faiga malo. O le talitonuga o tagata Toe Fuata'i, e le mafai e tagata ona fo'ia faafitauli o le lalolagi, peitai o agaga ua liua ma faafouina e latou te mafai. A o taumafai i latou e faatupu le toe fuata'iga faaleagaga i loto o tagata,

e mautinoa lava le mulimuli mai ai ma le toe fuata'iga faapolokiki ma fa'aaga fesoota'i.

I nei aso, o o tatou malo ma atunuu ua iai i se tulaga ua moomia ai lava se tasi toe fuata'iga. Mata o oe o se tagata e taula mai ai le Atua? Pe sili atu ona e popole pe faapefea manatu o tagata ia te oe pe afai e te faia le finagalo o le Atua, ona e popole ai lea i lagona lautele o tagata? Poo oe o se tasi o loo taumafai e te 'a'e i se apefa'i polokiki, poo se apefa'i tau tapua'iga, ina ia e lauiloa ai ma viia ai oe? Pe sili foi ia te oe lou nofonofa ai pea i le pumoomoo ma au uo ma e masani? Pe te loto tele ma e tu atu e fai oe ma 'a'ao o le Atua e 'a'apa atu ai i le lalolagi, tusa lava pe o le a le mea e tupu mai ai? Ou te lagona atu lava le alalaga mai o le motu o tagata, ma 'ai'oi mai mo se isi toe fuata'iga ma nisi suiga fou.

O e lagona?

mai le tusi: "God's Generals",
tusia e Roberts Liardon,
faamatalaina e
Afemata T. Apelu Aiavao

**E 1.3 mil-
iona lalolagi,
(earths) e tuu
faatasi faato'a
maua le lapo'a
o le la lea o loo
susulu mai iai.**

A Page for Youth

ITULAU MO TUPULAGA TALAVOU

Se'i Vaai Pe Se a Se Mea e te Mafai ona Fai

mai le itulau muamua

E ese lava le mea ua iai nei lo'u tagata. Pe tusa ma le tausaga ua mavae ou te le'i oo i se mea faapea. Aua o loo ave a'u ma se tasi o siamupini a le a'oga i mea tau taaloga. A o leni taimi, toetoe lava a 'ou le mafai ona 'ou savali. Na o le 'etu'etu!

Pe faafia ona ou sulu, pe pa'u, faato'a ou oo ai i le fale e fai ai koleniga ma ma feiloa'i ai ma lo'u faufautua o Hakelini (Dr. Richard Hagelin). Na ou nofo i lalo, faapa'u i lalo le tootoo sa fesoasoani i la'u 'etu'etu, sulu, 'etu'etu, pa'u. Na ou fai atu ia Hakelini: "E le mafai ona ou tamo'e, oso, 'a'e pe fai fo'i le tele o isi faamalosi tino. Ae ou te fia ave le mataupu o le faamalosi tino ma taaloga."

Na ou faapea a'u o le a fai mai e le mafai. O la'u lava miti o le fia ave lea o a'u ma faia'oga faamalosi tino ma taaloga. I le a'oga sa ou i 'au pasiketipolo ma soka sa siamupini i taamilosaga a a'oga. Sa ou lelei foi i le tamo'e ma le pesipolo. Sa iai ma isi a'u miti: ia ou iloa ta le kitara, ia ou iloa avevaalele, faaiipoipo i se tama'ita'i lalelei ma maua ai ni a ma tamaiti popoto.

Peitai i se po vevela i le masina o Iulai, i le faato'a uma o le faauuga a le a'oga, na ou fo'i ai i lo'u aiga ua ou ma'i. Ua malo lo'u ua ma ou masalosalo ai 'ai ua maua a'u i le fulu. Ae iai itu na popole ai lo'u tina, ona o le vekasini a Dr Salk mo le ma'i o le polio e le'i au atu i lo matou tama'i nuu.

O a'u o se tasi o ma'i polio mulimuli lava i le atunuu. E uma ane le fa ma le 'afa aso o lo'u ma'i

ua le mafai ona ou gaoioi. E te'a ane le taimi aupito tigaina o lo'u ma'i, ua sili i le 80% o o'u vae ua le aoga; ua matua le aoga atoa lo'u lima taumatau, ae na o le 50% o lo'u lima agavale o gaoioi. Fai mai le isi foma'i ia te a'u ou te le toe mafai ona ou savali.

Peitai, o loo iai lo'u 'aiga, ma lo'u faatuatua. E ave pea lava pea matou e o matou matua i le lotu. Na o le sefulu o'u tausaga ae ou alu i luma i le pulelaa ma ou fai i le Alii o le a ou faamuamua o ia i mea uma ou te fai.

E le taumate o le ala lea ou te le'i fesiligia ai lava le Alii pe tiga fo'i lo'u loto ona o le polio lea ua ou maua ai. Na ou talitonu lava e fesoasoani mai le Alii ia te a'u.

Na te'a ni masina se tele o le tau faamasani e savali ma faaoga o'u lima ma vae, ma ou tatalia tiga o o'u ta'otoga e tele na fai, ae ou tuua lo'u nofoa faatavale, ae ou savali i le kolisi e toe faaauau la'u a'oga.

O le a le mafai ona galo ia te a'u lea taimi ogaoga i le ofisa o Dr. Hakelini, a o o'u laulauina atu ia te ia o'u moomooga. E leai ma se tuai o lana tali mai: "Ia, se'i vaai pe sea se mea e te mafai ona fai."

Te'a ni nai tausaga ae faauuina a'u ua maua lo'u faailoga o le MA, ma lo'u tusi faia'oga i mataupu tau taaloga ma faamalosi tino (physical education) i a'oga maualalo ma a'oga kolisi. Sosoo ma le faatalanoaina o matou e toatele mo le avanoa faia'oga, ae ou maua ae le maua e isi e lelei uma o latou tino. I le kolisi na taunuu ai le isi a'u miti, ua pasi la'u ta kitara e ui lava e matua leaga lava lo'u lima taumatau. Na fai le matou faailo

ma isi tama ma maua ai tupe e totogi ai o matou pili a'oga.

A o le isi aso, oi se paga! Na ou iloa atu ai se teine matua lalelei lava. Na ou taamilo i le laina mo mea'ai ma ou taufesili poo ai lona igoa, poo ai foi na te iloa lelei le teine. Pe mafai e se isi ona faafesoota'i ma'ua. Ae na oo lava ina ou telefoni iai mo sa ma tafaoga. Ina ua ia ave a'u i lona aiga e faafeiloa'i atu a'u i lona tina, ae laulau mai le mea'ai, o le *steak dinner*, (o le fasipovi siteiki le 'aiga), na masaa uma i lalo o le laulau i le tete o o'u lima i le tau tipitipiga o le steak. Ae le'i amana'ia e Judy. Fai mai Judy na fai atu le tama na la uo muamua ia te ia, "O Dan Miller e pipili."

Ae tali iai Judy, "E le pipili pe a oo ina e iloa lelei ma e masani ai."

Na ma faaiipoipo ma Judy i le 1959 ma maua ai a ma tamaiti e to'a tolu a o o'u galue faafaia'oga. E iai faiga fou na ou faavaeina i le a'oa'oga o tamaiti, ona e le atoatoa lo'u tino, na fai ma mea e gasolo mai ai faia'oga mai isi itumalo e matamata pe faapefea ona ou faaogaina.

O le faalototele na fai mai e Dr. Hakelini: "Se'i vaai pe sea se mea e te mafai ona fai", sa fai ma ta'iala a o o'u tulitulua isi a'u matati'a. Na ou a'oga avevaalele ma maua ai lo'u tusi avevaalele. Na a'o fo'i la'u taalo i le tapolo (golf) lima tasi tauagavale.

Ina ua ave a'u ma pulea'oga, na ou taumafai e fai la'u a'oga o se a'oga e fiafia ai tamaiti e a'o'oga. E tele ni pine poo ni faailoga mo pulea'oga na ou maua. Ae na ou talitonu, o le Atua lava sa lotolotoi i a'u taumafaiga uma. O taimi uma ou te savali ai i totonu o le a'oga, ou te tatalo i le Alii ia fesoasoani mai.

Ou te le'i iloa pe na faapefea ona aafia tagata i lo'u faatuatua i le Atua. O le isi aso na sau ai se teineitiiti i lo'u ofisa. E iai ona faafitauli tau teine. Na ou faalo-

faaauau itulau e 9

A Page for Youth
ITULAU MO TUPULAGA TALAVOU

Ua le Fia A'oga

O le 'A'oga Faata'ita'i e a'oga ai. "E tasi a le mea ou te mana'o ai, ou te nofo i le fale, ua e iloa? Sa'o lea, a Mama?" O gutu o si tama'i Keli ua faamalo ina ua tautala mai i upu ia, ae na te iloa lelei lava, e le sa'o! Ua na iloa lelei fo'i, aua ua uma ona a'oa'oina ai, e iai mea i le olaga nei e le mafai ona suia. Ma o le alu i le a'oga o le isi lea mea e le mafai ona tuu.

Na ou le manatu mamafa tele iai ina ua amata aliali mai lona musu, ona sa iai lo'u talitonuga, e mafua mai lea uiga o Keli ona o se si'omaga fou lea ua amata ai - o le a'oga, e fou le fale, fou mea e iai, fou tamaiti. O le ma teine e matua ia Keli, e le faapea ona uiga. O le fiafia ia i le a'oga. - "O le manaia ia o le matou a'oga!" o le tala lea a le matua. Ae ina ua faaauau pea le musu o Keli i le a'oga, ma fai foi se matou tatalo i le taeao matou o ai e momoli i le a'oga, e le suia lava, ona ou alu ai loa lea i le faia'oga. Sa matauina foi e le faia'oga o

Keli, o Uina, uiga ia o Keli, ma popole ai foi ia. Na ma talatalanoa, e aunoa ma se ma iloa o se togafiti e fo'ia ai le musu o Keli i le a'oga. Na ou foi lava i le fale e leai ni tali ua ma maua, ae na tatalo ma tuu le faafitauli i le Atua.

O vaiaso na sosoo ai, ua tau le ta'ua e Keli lona le fia a'oga, ae sa ou matauina lava le faa'u'u, ma tatoso vae, pe a oo i le taimi e sauni ai mo le a'oga. Na ou mana'o lava ina ia toe fo'i ane le fiafia ma foliga 'ata'ata ia Keli e pei ona sa iai muamua a o le'i alu i le A'oga Fata'ita'i.

Ina ua tuua le a'oga i le isi aso, na ou matauina ua suia mata ita faalii o Keli, a ua 'ata'ata teisi. E oo atu le ma taavale i lo matou fale, ua uma ona faamatala mai ia te a'u ia le tamaitiiti o Iasoni, fai mai Keli e samasama lona ofu ma sa nofo e sosoo ma ia i le taimi o le malologa. Faamatala mai foi le galuega fou a le tama o Lisa, ma

le tala i le tina o le isi teineitiiti o Siniva. O le mea sa ou fia iloa, pe o le a le mea na suia ai uiga musu o Keli e a'oga, faa'u'u, i lea masina atoa ua mavae.

Peitai, a o matou nonofo i le lau-lau'ai i le afiafi lea, ae ta'u mai e Keli le mea lilo. "E te iloa le mea na tupu i le matou a'oga nei?" o lana fesili lea, ma le fiafia.

"Leai! o le a?" o le fesili lea a Papa.

"Na ma feto'ai ma le isi tamaitiiti, o'u pa'u ai i le vaivai i lalo o le faasee. Na sii a'u i luga e lo'u faiaoga ma faaoleole a'u. Na ia ave a'u i le faleta'ele ma to ese o'u seevae. Ua palapala uma, palapala uma foi ma o'u totini. E te talitonu i le mea na sosoo ai? Na tago mai le faiaoga ma mulumulu o'u vae palapala! Fufulu mama lelei lava!"

Ua leai se isi e tautala. Ua na o le fetilotoila'o'i solo o Keli ia matou. Ua ou lagona nei ua tali mai le Atua ia matou talosaga. Ua amata susu o'u mata i loimata.

Ua ou manatua le mulumuluina e Iesu o vae lelava o le ausoo. Vae palapala! Ua le manatu lava ia i lona tulaga, i lona tagata, o ia o le Alo o le Atua Soifua. A ua mulumulu vae. O le galuega a le pologa! O le galuega a le auauna! A ua ia faia! A o ia o le Alii ma le Faaola. O le Alo o le Atua Soifua! A ua mulumulu vae!

O le mea na ia faia, na suia ai le olaga o i latou sa mulimuli ia te ia, ma le olaga o i latou uma na faalogologo ia latou tala'iga. E le'i manatu iai Misi Uina i lana mea na fai, o le a soloi'esea ai uiga musu, faalii, ma loto tetee ia Keli. Ae mafaufau, e alolofa lava tagata ia ia, e pei ona fai e Misi Uina, ma mulumulu ai ona vae palapala. Ua pei ai lona faia'oga o se pologa, poo se auauna, o tagata o le latou galuega, o le mulumulu vae palapala o tagata a o le'i ulu mai i i totonu o le fale.

Se'i Vaai Pe Se a Se Mea e te Mafai ona Fai

mai le itulau e 8
totele iai ina ia talitonu e na te mafai le a'oga. Iva tausaga e te'a ae faauu i le kolisi ma faailoga maualuluga. I sana tala na tusi i le a'oga e uiga i lona olaga na ia faapea ai, "Na faalototeleina a'u e Mr. Miller ma a'oa'o a'u ina ia ou 'ata'ata ma talitonu ia te a'u lava.

Ona ou manatua ai lea o le tagata fo'i faapea i lo'u fo'i olaga. Ona ou tusi ai lea, ina ua te'a tausaga e 30, ia Dr. Hakelini e uiga i le aoga o lana faalototele ia te a'u i la tausaga e tele ua mavae. Ua itiaea Hakelini ma ua toetoe lava

a po atoa lana vaai. Ae na faalototeleina foi o ia e la'u tusi. I se faamanuia a le a'oga sa faia'oga ai Hakelini ma ou a'oga ai, na ou faia ai le lauga autu, ma ou fai ai le tala ia Hakelini ma lana faalototele na fai ma ta'iala i lo'u olaga.

Na faaogaina e le Atua ana afioga paia i tausaga e tele ua mavae, ma sui ai olaga o tagata. O le a se mea e te mafai e oe ona fai mo isi? tusia e Dan Miller

O le Faaipoipoga ma le Faapouliuli

mai le itulau e 5

maua; o le eseese o le maualuga o le a'oa'oaina; atoa ma talitonuga faale-lotu. Ma o loo aofia ai i nei mafuaaga le fesuaiga ua iai le olaga o aso nei. O le tele o tina ua mafai nei ona maua lava e ia mea tau tupe e fai ai mea e mana'o iai, ma ua le toe faalagolago ai i o latou ta'ito'alu. O le tele foi o nisi faafitauli, e pogai mai i le maua o ni galuega, ma le popole o le leai o se tupe. Ma e le masalomia o le isi mafuaaga o le tete'a o ulugalii, o le aga'i i lalo o le faatuatuga faa-kerisiano, atoa ma le le amana'ia ma le le talitonu atoatoa i le pa'ia ma le tumau o le Faaipoipoga.

O le isi mea, o le aga'i o ulugalii i faaipoipoga faale-malo, o se faailoga manino lea o le malosi o le faale-lalolagi i lea vaega o le olaga. Ma ou te manatu foi, e foliga o loo faasolo ina aga'i le Ekalesia i le taliaina o faiga faale-lalolagi, e pei o le faaipoipo i lalo o laua ma matafaga, ae le o le falesa. E foliga foi ua faasolo ina tau le amana'ia le vaai faa-Kerisiano i le faaipoipoga, o se Feagaiga ma se maliega mo le olaga atoa, ma e pei e foliga ua tau le manatu mamafa iai le Ekalesia i nei fesuaiga ua agai iai. E pei ua sili lava le faatau o le manatu faapito o le tagata ia, ma lana aia tatau i soo se mea.

O le Faapouliuli:

O le Faapouliuli, o le nonofo faatasi faaulugalii, ae le faaipoipo. O lenei faiga, ua faasolo pea ina taliaina ma fafia iai le toatele o tagata. E foliga foi ua mou malie atu le igoa sa taatele i aso ua mavae mo lea faiga - o le faapouliuli, poo le nonofo i le agasala. E tele lava ina nonofo faapouliuli ulugalii ona ua manatu o le mea sili lea. Fai ma faata'ita'iga, ona ua manatu le toatele, o le a toe mulimuli fo'ia i

le mea sese a o latou matua faaipoipo i le faatinoga o faaipoipoga taugata. O nisi foi, e mafua ona ua latou le faatauaina a'oa'oga a le Tusi Paia e uiga i le Faaipoipoga.

O le Faapouliuli e le Mautu:

Fai mai lava isi, e tele ina le umi le soifua o le nonofo faapouliuli. Aua e le malosi atu pei o le nonofo faaulugalii faaipoipo. O le manatu faapea e nonofo muamua faapouliuli, o se tulaga e avea ai le faaipoipo i se taimi mulimuli ane, ma ulugalii malosi, e le matua faamaonia lelei lea mea. O ulugalii foi e nonofo faapouliuli, e tele ina iai isi uo faalilolilo aemaise lava i le tane. E moni lava e leai se tagata e atoatoa ona lelei i lana amio, ma e ono iai foi mea faalilolilo i ulugalii faaipoipo latou, peitai, e leai a se isi ituaiga fesoota'iga e tutusa ma le faaipoipo aua e ono malosi ai le manatu e faamaoni le tasi i le isi i le olaga atoa. Pei ona fai mai le Tusi Paia:

“O e ua faatasia e le Atua, ‘auna ne’i faate’a’eseina e se tagata. (Mataio 19:6)

E taua lava lo tatou vaai i le Faaipoipoga, o se meaalofo a le Atua mo tagata uma.

O le Faapouliuli, e le Aloa'ia Lelei

O le mea o loo misi i le faapouliuli, o le faia aloa'ia lea i luma o tagata, o faatinoga ma ta'utinoga e pei ona fai i le sauniga o le Faaipoipoga. Ua tatou vaai i le faamatalaga a le Tusi Paia i le Faaipoipoga i le Kenese 2:24: “O le mea lea ua tuua ai e le tane lona tama ma lona tina, ae faatasi ma lana ava, ona avea ai lea o i laua ma tino e tasi.” O loo aofia i lea faaaliga le tuua o matua. O le faiga masani i na taimi, o le “tuua”, e le o se mea e fai na o oe, ae o se mea e fai faalaua'itele. I o tatou taimi, e le mafai ona faataua i le alu 'ese

ma le aiga, pei o se tama a'oga ua alu ese i se a'oga nofo tumau. O le “tuua”, o se mea e fai aloa'ia e iai lona uiga mai le faalagolago i le toe faalagolago. Mai le aiga i ona matua i le faavaeina lea o lona lava aiga. O ni fesoota'iga e moomia le fai aloa'ia ma faalaua'itele i le amataga. E le o se mea fetau le te'i a ua tuua aiga e le iloa pe aisea, poo fea foi ua iai. E le na o matua, pe na o le aiga ma uo e tatau ona iloa le fesoota'iga ua iai, ma auai i le fesoota'iga fou ua iai, ae o le nuu atoa lava. O fesoota'iga faaulugalii, o le mea na o le ulugalii a latou, ae le o fesoota'iga o loo faatino ai ia tulaga. Peita'i, o e faapouliuli, latou te le faailogaina lea eseese, ma latou faia ai le mea sese o le manatu i le la fesoota'iga atoa, o se mea patino mo na o la'ua lava.

O le isi foi mea taua, o le tulaga o le tulafono i le Faaipoipoga. E ui ina le amana'ia tele i le tulafono le faaipoipoga lava ia, ae o le faatinoga faale-tulafono, o se mea aoga. O le tautinoga e le faigofie ona tumau, e aunoa ma le faamalumu a le tulafono. E le gata i lea, o le ulugalii ua tautino le faamaoni o le tasi i le isi, la te moomia le puipuiga a le tulafono mo la'ua.

O le faalaua'itele o le faatinoga o le faaipoipoga e taua tele; aua e fai ai le faapotopotoga ma molimau i folafolaga e fai e le tane ma le fafine. E faailoa ai, ua la talia le uiga ma le faamoemoe o le Faaipoipoga la te ta'utinoga lea tulaga i luma o le faapotopotoga, faapena foi le tasi i le isi.

Ae i le tulaga o le Faapouliuli, o lea fesoota'iga e le manino lelei. E leai ni a la ta'utinoga ta'ito'atasi e iloa ai lo la ofoina atu atoa o le tasi i le isi mo lo la saogalemu. Ua valaauina i laua e

faaauau itulau o sosoo ai

O le Falaoa o le Ola

O le Atua Na Te Fafaga Lo'u Agaga Ioane 6:35: "O a'u nei le areto o le ola."

O le falaoa e mo le ua fia'ai; ua fai mai Iesu o ia e mo le agaga o le tagata.

Malaga i soo se atunuu lava o le lalolagi ma ulufale i soo se fale'aiga, e mautinoa lava le laulau mai mo oe se taumafataga e iai ma le falaoa.

O le falaoa o le mea'ai taatele. A leai lava nisi mea'ai a tagata matitiva, e le misia lava le iai o le falaoa. Tusa lava pe o le a le mauoloa i fea o ni tagata, e le mafai lava ona leai se falaoa i luga o le latou laulau 'aiga. O le falaoa

e le se mea'ai e faasino i se na o se vaega o le lalolagi, pe fai mai foi se atunuu e na o latou e ona le falaoa. O le falaoa ona pau lea o le mea'ai e tofufusia uma ai le lalolagi. E maua i Mekiseko, ae ta'u o le tortilla. E maua i Niu Ioka, ae igoa o le bagel. O le falaoa e maua lava i soo se mea o soifua ai tagata. E faapena foi Keriso.

O le falaoa e taumafaina i aso uma. O nisi o fuala'au 'aina e maua i nisi masina o le tausaga ae le maua i isi masina. O le falaoa, e maua i aso uma. E faapena foi Iesu Keriso. E tatau ona iai Iesu

i luga o le tatou laulau i aso uma. Na te fafaga i o tatou agaga, e le na o ni nai masina, poo ni sauniga faapitoa, a o aso uma.

E tele foi foliga o le falaoa - e papafalaoa, e mafolafola, e ta'ai'ai isi, e faapa'u isi, ma faapata ma siamu, e fai ai foi saniusi. E faapea foi Iesu. E na te faamalieina ituaiga mana'oga o tatou. E iai ana saunoaga e aoga mo e nofo toatasi, pe mo i latou e femili ma e lauiloa. E fesoasoani o ia mo e le 'ato'atoa le tino, pe mafatia foi i ona lagona.

Afai o manino lau vaai, e mafai ona ia fesoasoani. Afai o faanene-fu, e mafai ona fesoasoani atu ia te oe. E mafai lava ona ia fo'ia soo se faafitauli.

E te malamalama la i le mea na ala ai ona ta'u e Iesu o ia o le areto (falaoa) o le ola? Aua e maua i soo
faaauau itulau e 13

O le Faaipoipoga ma le Faapouliuli

mai le itulau e 10

le Atua ia faamaoni le tasi i le isi, tusa lava pe la te le iloa lea tulaga.

O le Faapouliuli e le Atoatoa

O le Faapouliuli, ua le taua ai se sauniga faale-lotu i luma o le silafaga a le Atua. Peitai, ona o ta'utinoga o le olaga atoa e tatau ona fai i luma o se faapotopotoga e taua ai se sauniga faale-lotu e faatino, e faafeagai lelei lea mo tagata talitonu i le Atua. E ui ina o le Faaipoipoga, e le o se sakarameta e pei o le sauniga o le Papatisoga, ae o nei sauniga e aofia ai le ofoina atu i luma o le faapotopotoga o ta'utinoga faapea, e molimau iai.

I le aotelega, e tatau lava i ta'utinoga a le ulugalii ona fai i luma o tagata, ma ia fai o ni ta'utinoga e tumau. Ma o le vaega a le aiga faapea ma le vaega a le tulafono ma le vaega a le Ekalesia, o i'ina o loo taatia ai le eseesega o le Faaipoipoga ma le Faapouliuli. I lo'u manatu e le o se mea atamai le talia o lenei ala o le faapouliuli e faatino ai fesoota'iga tumau faaulugalii. E tatau

mo Kerisiano uma ona taofi mau i le taua o le Faaipoipoga faa-Kerisiano. O le tatou tiute o le taofi mau e aunoa ma le faaluaina i se isi faiga, le taua o le Faaipoipoga, pei ona faamatalaina i le Tusi Paia. O le faaipoipoga o se mea e faatino faalaua'itele ma aloa'ia. Ae o le faapouliuli, e tumau pea o se mea faalilolilo mo na o le to'alua lava. O le faapouliuli e le o se faaipoipoga faaleatoa, ma e le mafai ona fai ma faaipoipoga tusa lava pe o le a le igoa e faaigoa ai.

Upu Mulimuli

O le feau faamamafa o le Pepa - o se valaau i le Ekalesia Kerisiano e faatino le faaipoipoga, o se ala e sili atu ona lelei nai lo le faapouliuli. O le Faaipoipoga o le ala e sili atu ua a'oa'o mai e le Tusi Paia, e faatasia ai ulugalii e tusa ma le finagalo o le Atua. O le taua o le faaipoipoga o loo i le finagalo o le Atua, ma e ao ina tatou faatumaaina e aunoa ma le faaluaina ma se isi mea, ia lona taua i le silafaga a le Atua.

Fesili:

1. O le a sou manatu, se agasala le

faapouliuli?

2. Se mea fetau i le faa-Kerisiano lo tatou faapea - o le faapouliuli o se sitepu aga'i i le avefa ma ulugalii faaipoipo?

3. Faamata e le o le soona faataugata o le faatinoga o le faaipoipoga o loo fai ma ala o le tosina o le toatele e talia le faapouliuli?

Ia manuia le tauaofia o le Fono Tele a le Ekalesia.

Fai Mai e a Salamo e 127-128 e Uiga i le 'Aiga - (Family)?

O le Mafuaaga o le Pese
faaigaina i le pogi ni. E le o ia
mai nei Salamo:

* O aiga Kerisiano uma lava e
lelei, ma o le a latou maua se ma-
futaga faa-ulugalii faaipoipo fiafia.
* O le vaega taua lava tau i ta-
maitai latou o le fanauina mai lea
o ni tamaiti se toatele.

* O ulugalii Kerisiano uma o le a
latou maua ni fanau se toatele, ma
ni fanau a fanau o le a lolofi atu ia

i latou i Kerisimasi uma.

A o le a tonu le mea o tautala mai
ai nei Salamo?

* O faamanuiaga tau i le aiga e
mai le Alii. 'A 'e maua se aiga,
family, lelei, vivii i le Atua ona o
lea mea taua.

* O le fiafia ma le filemu, o uiga
vaaia ia o se aiga lelei.

* E tausii lelei e le Atua lou aiga
e pei lava foi ona ia tausii lelei le
Ekalesia faapea ma le atunuu.

A o le faalavelave o loo tatou
nonofo i se lalolagi agasala, ma
aafia gofie ai tatou i uiga faati'apo-

lo. O nisi o tagata pa'ia, poo ni
Kerisiano logologoa foi, latou
te le'i maua faamanuiaga o loo
ta'ua i nei Salamo. O nisi o latou
e le'i faaipoipo pe faia ni o latou
aiga, e ui lava latou te manana'o
iai; o nisi foi, ua faaipoipo mo ni
tausaga se tele, ae le maua ni ta-
maiti. O nisi foi, ua oti ni a latou
fanau a o laiti lava; pe oti foi le
to'alua.

Ae lelei lava le mea na fautuaina
mai e Matini Luteru. "Tuu le Atua

faaauau itulau e sosoo ai

My Country, 'Tis of Thee

mai le itulau muamua

ma pepese atu ai i le Atua, na
ala ai ona tusia e se tama a'oga
o le mataupu silisili e 24 ona
tausaga, o Samuelu Faranisisi
Simiti, lenei pese i se fasi pepa
i se taimi e na o le 30 minute i le
tausaga e 1832. O se vii e faafe-
tai ai i le Atua ona o se atunuu
matagofie ua latou maua.

E oo mai lava i le aso, e manatu
lava le toatele o tagata, o le pese
"My Country, 'Tis of Thee",
o le latou viiga faale-atunuu
lea e sili ona latou lagonaina le
o'oo'o ifo i agaga uiga loloto o
ona upu, ma le fati. Ma latou
ta'ua lea pese o le vii lea e le o
faamamaluina o le atunuu. E
faigofie lava ona usuina upu o
le pese i le fati ua aloa'ia ma
fiafia iai le toatele o tagata i
atunuu uma o le lalolagi. E oo
i Egelani, e tele lava ina uilua
ma le vii o le tupu "God Save
the Queen".

O lagona malolosi o loo aumai
e upu o le pese na vave lava ona
'apoina e le to'atele o tagata,
ma avea ai o se vii poo se pese
e matua fiafia iai le atunuu atoa.
O viiviiga o le atunuu na fa-

nanau ai o latou tama, i fuaiupu
muamua e tolu, na faai'ui'u atu
i le tapua'i i lona mata'utia ma
le silisiliese, ma le tatalo mo le
faaauauina o lana ta'ita'iga o le
atunuu.

Ina ua i'u mai le Iunivesite o
Harvard ma le a'oga faafaifeau,
ona amata lauiloa ai lea o Samu-
elu Faranisisi Simiti o se faifeau
tausaafia, ina ua galue i nisi o au-
lotu Papatiso i le itu i sasa'e o le
atunuu. E 150 ni pese o viiga na
ia tusia i ona tausaga na soifua ai
e 87. Na fesoasoani foi o ia e tuu
faatasi le tusi pese a le Ekalesia

My country, 'tis of thee, sweet land of liberty, of thee I sing land
where my fathers died, land of the pilgrims' pride, from ev'ry moun-
tain side let freedom ring!

My native country, thee, land of the noble free, thy name I love; I
love thy rocks and rills, thy woods and templed hill; my heart with
rapture thrills like that above.

Let music swell the breeze, and ring from all the trees sweet free-
dom's song; let mortal tongues awake, let all that breathe partake; let
rocks their silence break, the sound prolong.

Our fathers' God, to Thee, author of liberty, to Thee we sing long
may our land be bright with freedom's holy light, protect us by Thy
might, great God, our King!

O le Falaoa o le Ola

mai le itulau e 11

se aso, i soo se atunuu o le lalolagi.

Tatou mafauafau ane pe faapefea ona maua le falaoa. E muamua ona toto le saito i le fanua. A matua ona fua, ona sala lea ma faaputupu. Lulu ia to'ulu ese le saito, ona olo lea se'ia oo ina avefa ma falaoamata. Palu ma fai ai potoi ma 'ave ua tao i le ogaumu. A vela ona tufatufa lea pe faatau atu i tagata.

A misi se isi o sitepu ia ua ta'ua i luga, e le maua le mea e ta'ua o le falaoa - Bread!

Tatou mafauafau ane ia Iesu. Na ola a'e o ia o se tama'i laau i luma

o le Alii - "Na tupu a'e o ia e pei o se tatupu i ona luma." Na o se tama talavou mai le miliona ma miliona o tama o iai i le paneta o le lalolagi. Na o se tama e toatasi mai tama e fia sefulu afe i Isaraelu. O se tama foi e toatasi mai Nasareta. E le ese mai isi foi tama.

Peitai, e pei lava o le saito, na salaina i lalo. E pei lava o le saito, na sasaina. Isaia 53:5: "A ua manu'a o ia ona o a tatou solitulafono, ua momomo o ia ona o a tatou amio leaga." E pei lava foi o le falaoa i le afi, e faapea foi le Alii. I luga o le satauro na ui atu ai o ia i

le afi o le to'asa o le Atua, e le ona o ni ana agasala, ae ona o a tatou agasala. "A ua faaoo ia te ia e le Alii le amio leaga o i tatou uma."

O le isi vaega, o le tufatufaina o le falaoa. Ua tuu lea e Iesu mo tatou tatou te faia. O tatou o le 'au tufatufa. E le mafai ona tatou faamalosiiina tagata e 'a'ai i le falaoa. Ae ia mautinoa o loo maua e tagata le falaoa. Ae tele ina tatou le tufatufaina, a ua tatou nofonono ma tatou.

Fai Mai e a Salamo e 127-128 e Uiga i le 'Aiga - (Family)?

mai le itulau e 12

na te atia'e le 'aiga ma tausi. O a ni moomooga i ia mea uma o ni mea lava e mo le Alii na te vaaia." I se isi faaupuga, ia e ola e faavae i luga o le fuaiupu muamua o le Salamo e 128, ma tuu i le Atua na te vaaia ou mana'oga ma moomooga.

Salamo 128:

* Amuia i latou uma o e matata'u i le Alii, o e savavali i ona ala.

* Aua e te 'ai i mea e galue ai ou lima; e ia te oe le manuia, e ia te oe foi le lelei.

* E avefa lau ava e pei o le vine e fua tele mai i totonu o lou fale; o lau fanau e pei o tama'i olive e vagavagai lau la'o'ai.

* Faauta, e faapea ona manuia o le tagata e mata'u i le Alii.

* E faamanuia mai le Alii ia te oe mai Siona; ona e iloa atu lea o le manuia o Ieruselema i aso uma o lou olaga. E te iloa atu foi le fanau a lau fanau; e ia Isaraelu le manuia.

Na sau le tagata mativa 'aisi ma nofo mai i o'u luma ma fai mai: "Ta fia maua se falaoa!"

Na ou tali, "Matua sa'o le mea ua e sau ai. O le falaoa le mea e sili ona e mana'omia. Ua e sau tonu lava i le mea e maua ai falaoa, aua o le falefalaoa leni." Ona ou tago lea ua toso mai la'u tusi kuka mai le fata, ma amata ona faamatala i le tagata 'aisi mativa le faiga o le falaoa, ma poo a mea e palu faatasi, pe faapefea foi ona tao i le ogaumu.. Ou te tepa a'e i luga ma ou vaai atu i le tagata mativa, e le foliga fiafia, a ua fai mai ia te a'u, "Na o se falaoa ou te mana'o iai."

"Oi, ia mulimuli mai ia a'u. Ta o e faamatamata oe i le fale tao falaoa. E sili atu ona manaia lo matou fale tao falaoa i se isi lava fale fai falaoa."

Ae le tautala lava le tagata mativa, ma ou manatu ai 'ai o le ofo o le alii i le manaia o lo matou fale fai falaoa. Ona ou fai atu lea, "E a, ua e ofo! E toatele tagata e lolofi mai i lo matou fale fai falaoa e matamata ma le ofo i le lelei o a matou falaoa." Ua nofo ifo le

tagata 'aisi i le nofo lea e pito mai i luma i le falesa. Ua ou talitonu ou te iloa le mea o loo mana'o iai, ona ou toe fesili lea, "E te mana'o ou te faamatalaina atu isi vaega o le fale fai falaoa, ma le fiafia o tagata e faigaluega ai?"

Fai mai le tali a le mativa, "Leai! E tasi lava le mea ou te mana'o iai na ala ai ona ou sau, e fia maua sa'u falaoa. E iai 'ea ni a outou falaoa e faatau pe leai?"

"Ioe, e tele. Ae a e savali i le auala leni, e te le maua ai ni falaoa lelei i isi falefalaoa la e iai.. Na o inei e maua ai falaoa e sili ona lelei, e tusa ai ma mea o faatonu mai e le tusi kuka."

Ua liliu le mativa ma savali ese. Na ou fesili, "E te le mana'o i se falaoa?"

"Ou te mana'o iai, ae ua uma foi lo'u fia 'ai falaoa i le tele o na mau mea e te lau mai ae tasi lava le mea na ou sau ai o se falaoa."

Tatou laugaina le Faifalaoa ma faatau atu ana falaoa, ae le o tatou ma o tatou fale falaoa.

mai le tusi a Max Lucado

O le Faata'oto i le Falaoa

O le Tala i le Tagata Mativa ma le Falaoa

O le La'o'ai mo le Agaga

Afai na mafai e le Atua ona toe faatuina Iesu mai le oti, na te mafaia ona fai soo se mea tatou te manana'o iai.

Sa tauia lo la Faatuatua

Soo se tulaga lava aga'i i luma o lo tatou ola faaleagaga e aulia lava lea e tusa ma le tupu a'e ma le faatinoina o lo tatou faatuatua.

O loo faaalua lelei lea mea e tauaso e toalua ia na fetaia'i ma Iesu (Mataio9:27-30). O nei tauaso e toalua na mulimuli atu ia Iesu ma alalaga atu, "Le Alo o Tavita e, ia e alofa mai ia te i ma'ua."

Sa la faalogo i lona faamaloloina o le fafine sa ma'i i tausaga e tele, atoa ma lona toe faatuina o le teine na oti. Ua tupu nei lo la faatuatua e ala i lo la faalogo.

O loo tusia, e maua le faatuatua i le faalogologo, o le faalogologo foi e i le afioga a le Atua lea. Manatua, o nei tagata e tauaso, la te le'i vaai lava ia Iesu o ia faia se vavega. E toatele lava tagata ua talitonu ia Iesu ona o mea ua latou vaai iai. Na latou vaai tino ia Iesu o faamalolo i tagata mama'i, fafaga le motu o tagata, lea na tele mea'ai na totoe i lo mea'ai na fafaga ai; faamalu le afa; faasavali le pipili; faapupula le tauaso; ma le tele o isi lava galuega mamana na ia faia. Peitai, o nei tauaso ua ta'ua nei, la te le'i vaai lava i se tasi o ia mea. Na maua lo la faatuatua ona o le la faalogo.

O le oti o le tagata, e mafua ona ua le toe fesoota'i atu le tino i mea ia o si'omia ai. A oti le tagata o lona uiga, ua le toe lagona pe fesoota'i atu taliga i le leo, mata ma le malamalama, totoga e manava ai ma le 'ea, totoga e galuea'iina ai mea'ai. Peita'i a mafai e Iesu ona toe faaleleia loa ia mea i le toe faatuina o le oti, ma lagona e ia tauaso e mafai lelei e Iesu ona

toe faafo'i ane le la vaai.

O lo tatou faatuatua faa-kerisia-no, ua faavaeina lea i luga tonu o le mea moni aupito tele o le lalolagi lenei: O le toe tu o le Alii o Iesu Keriso mai le oti. Afai na mafai e le Atua ona toe faatuina Keriso mai le oti, o le mea moni e tatau ai mo tagata ta'ito'atasi uma ona talitonu e mafai e le Atua ona fai o soo se mea. E mafai faapefea ona tatou iloa e mafai e le Atua ona faaola le tagata agasala ua i le loloto o le agasala? Ona sa ia faia se mea e sili atu i lona toe faatuina o Keriso mai le oti.

Afai ua matua mafatia se tasi i se ma'i, e mafai faapefea ona tatou iloa na te mafai ona faamaloloina? Aua na ia faia se mea e sili atu ona malosi ina ua ia toe faatuina Keriso mai le oti.

O nei tauaso sa matua tele lo la faatuatua. "Ua la alalaga." E masani i nisi aso ona iloa le agaga o le faaalalo loloto i le mea e iai le sili ma le tele.

E faapea se tala: Sa iai se tama'ita'i tauaso sa nofo lava e lata i tua o se mafutaga toatele lava. E toatele sa o atu i luma e tatalo ai, peitai, sa nofo pea i tua lea tina. Ina ua o atu nisi e fesoasoani i le tina ina ia ta'ita'i i luma e tatalo ai, sa tali ane o ia, "O le a lo outou manatu, tou te manatu ea ia ou alu atu i luma o na tagata uma? E leai ou te le alu atu." E tauaso le tina, ma na te le iloa foi na tagata uma, peitai e iai se mea o loo taofia ai o ia iina, o lea na ia alu ese ai e aunoa ma faamanuiaga.

E iai tagata e toatele e o atu i le malaia e faavavau ona o le loto faafiasili e le fia fesili atu i le Atua ina ia faaolaina i latou. E sili ia i latou le taofi ma le vaai ifo i le mamalu nai lo le o atu i le Atua ma fesili ia te ia mo mea latou te manana'o iai.

O le faatuatua o nei tauaso, o le faatuatua e le maluluina. E oo lava ina talia lo la mana'o. Sa maliu ane Iesu. Sa fetuleni atu le toatele ia te ia.

Ina ua la faalogo atu i le pisapisao o tagata, sa la alalaga atu: "Le Alo o Tavita e, ia e alofa mai ia te i ma'ua." Sa na ona la faalogo atu i le savavali mai o tagata ae le'i afio mai lava Iesu. Sa la toe valaau: "Le Alo o Tavita e, ia e alofa mai ia te i ma'ua." Ae le'i alu ane lava o ia. Ou te manatu sa musumusu atu Satani ia i la'ua e faapea, "E le fiafia mai Iesu ia oulua. O le a le mea lua te saga pisa ai? Vaai o oulua na o ni tagata 'aisi matitiva. Ioe, sa ia faatuina le afafine o Iairo, aua o Iairo o le alii mau'oa."

Ina ua maliu ese Iesu, sa fesili tauaso poo fea le ala ua maliu iai, ma sa la mulimuli atu iai. E leai e le mafai ona teena i la'ua. E tofotofoina e le Atua lo tatou faatuatua, e le ina pa'u'u, a ia faamalosi atili. Ou te manatu e le tatau ona tatou manatu o le a tali mai loa le Atua i mea uma taitasi tatou te fesili atu ai ia te ia, e le o iloa lava se mea faapena i le Tusi Paia.

E mafai lava ona e faafeagai ma se tauviga tele ua tuuina mai e le Atua i luma tonu o lou faatuatua. Ua faapea mai le Tusi Paia, "O lo outou faatuatua ma lo outou onosa'i tou te ola ai." Ou te talitonu sa iai lava le finagalo o Iesu i tauaso ma le naunau e vaai atu ua la o mai, atonu ua manu'anu'a i ni o la pa'u'u i le 'auala sa taumafai ai e tuliloa mai ia te ia ina ia maua lava o ia.

Na faafeto'ai e Iesu i le fesili tofotofa: "Ua oulua faatuatua mai ea ia te a'u ou te mafaia lenei mea?" Atonu pe na faapea mai le la tali, "Iesu e, a na ma le faatuatua, poo ma le taumafai malosi ma te o *faaauau itulau e sosoo ai*

Tulaga Tau Tupe a le Ekalesia

O se tala lenei i le tulaga tau tupe a le Ekalesia,, e pei ona faataatia i luma o le laulau a le Fono Tele 2016. Ua faailoa mai le tulaga o tupe a le Ekalesia o loo iai i faletupe i Samoa.

SCB: \$3,793,985.84 ovatoloa e faamuta ia Tesema 2015.

ANZ: \$504,694.84 ovatoloa e faamuta ia Tesema 2016.

ANZ: \$630,784.48 mokesi ai le ovatoloa i le ANZ.

UTOS: \$2,323,638.18 tupe o loo totoe i le UTOS 2015. O le isi tupe atoa ai le 4 miliona, ua uma ona tala i tua mo le faamoemega o galuega o feagai ma le Ekalesia ma totogi o tagata faigaluega.

O le tulaga vaai lea o tulaga tau tupe a le Ekalesia i le taimi nei, ao loo faasolo pea galuega tetele faapei ona iai nei. O loo matua mana'omia lava se seleni mo le faaauauina o nei galuega, faatasi ma totogi o tagata faigaluega a le Ekalesia.

Ma o le talanoaina o lenei tala, na

aga'i ai fesili i se tala mai o galuega o le Iupeli ma le Ioane Viliamu. Sa faailoa ai e le Laulau a le Fono Tele o le Ioane Viliamu, o lea ua fai feutaga'iga ma le konekarate i le oo atu ia Oketopa ua mae'a le galuega ma o ese loa ma le nofoaga o loo latou faaaogaina, e ui ina tele lava foi isi faigata o loo tau faafoe i le taimi nei.

Mo le Iupeli, sa faailoa foi e le Laulau a le Fono Tele, le tulaga faaletonu o le galuega i le taimi nei ona ua faailoa mai e le konekarate a le Shanghai o Oketopa e uma ai le latou galuega. O le vaega lava lea o le maliega ua uma ona sainia, e uma ai le latou galuega, o le tino o le fale. A o le falealuga ma le faaumaina o le fale, faatasi ma ona totoga o le isi lea o mea fou. O lona uiga e manaomia se isi tupe mo le faamoemoe lenei.

Ma o le tupe ua talosagaina mai mo le faaumaina o le galuega, e lima miliona. Ma o se faanoanoga tele lea, ona o le matauga sa iai i le Fono Tele, poo le aga'i atu i se 11 miliona le tau mo le fale atoa

lava. Peitai ua lagona le faanoanoa i le sa fai ma Failautusi, Iutisone Salevao ona o le faamoemoga na tuuina atu e le Ekalesia ia te ia, a ua foliga 'olegia le Ekalesia ma mea na tuuina mai i le Fono Tele.

Ui i le tele o le faanoanoa ona o nei galuega ma lo latou faafoeina, ae mo lenei lava taimi e ao ona fai se galuega ina ia mafai ona faaauau nei galuega e aunoa ma le taofia. Ona faia ai lea o le iuga a le Komiti:

IUGA:

(i) Ia fai se talosaga i soo se faletupe e mafai ona nono mai ai se tupe mo le faamoemoe o galuega nei ina ia faaauauina ma faauma.

(ii) O le tupe ua finagalo le Komiti e nono mai e 15 miliona tala.

(iii) O le faiga o le totogiina o lenei tupe, o le a aga'i iai le talanoaga a le Komiti i le isi ana fonotaga o lumana'i.

(iv) Ua tuu atu foi i le Laulau a le Fono Tele ma le Laulau a le Komiti Tupe le sailiga mo se faletupe e mafai ona tali mai i le taimi nei.

O le La'o'ai mo le Agaga

mai i le mea o loo e iai." E toatele e o mai e le faatuatua, e na ona iai lo latou faamoemoe, peitai, e le faapena tauaso. Fai mai la'ua, "Toe, le Alii e."

Na mafai lava ona oo le silasila a Keriso i loto o ia tauaso, ma na silafia lelei ai lo la faatuatua. Ua ia pa'i atu ia te ia. (f2-9). E le o lo la faatuatua na faamaloloina i la'ua, a o le pa'i a Iesu. Ina ua pa'i atu Iesu i o la mata, na amata loa ona toe gaioi neura ma musele ua leva ona mamate. Ua amata ona toe sosolo ane le malamalama se'ia oo ina toe pupula o la mata.

Atonu pe sa feva'aia'i le tasi i

le isi ma faapea: "Ua ou iloa lelei atu oe. O oe lenei, a o a'u lenei." Ua la vaai a'e i le lagi lanumoana. Ua la vaai atu i le matagofie o tafatafa'ilagi. Atonu sa la faapea, "Sa taumafai nisi e faamatala mai ia i ta'ua le matagofie o nei vaaiga eseese, ae le tusa ma le matagofie ua ta vaai lava i ta'ua iai.

O le a le faamanuiaga o e fia maua: O le a le pa'i a le Atua o e fia maua? E tatau nei ona e matua saili atu ia Iesu.

O se isi mataupu mai le Komiti o Tupe ua talia e le Fono Tele, o le fautuaina o le Teutupe, ina ia taga'i ane sei tau faagesegese le tuuina atu o tupe mo galuega ua talia, ona o le tulaga o tupe ua iai i le taimi nei. Ia faaauau pea le totogi o tagata faigaluega, faapea le galuega o le Iupeli.

**There are no noises
on the moon, because
there is no air to carry
sounds.**

M Agelu i le Vaai a le Tolu Tausaga

O le isi aso, o le taimi lea e na o le tolu tausaga o la'u tama tama, lea e moe ma tafiti solo i luga o lona moega. E le masani ona ou kiina le televise ma ou matamata ai i polokalame faatalatalanoa. Ae na ou kiina le televise, ma ou fia matamata ai i le polokalame o faaali mai. O loo faatalanoa ni tagata matutua lea e talanoa i ni faalavelave na oo ia latou toetoe lava a feoti ai.

Ua ou fia matamata ma faalogologo i le polokalame, ona o la'u tama, na matua tigaina lona ma'i ina ua fanau mai, ma oo ina atoa le vaiaso o faaoga le masini e faamanava ai, sosoo ma le lua vaiaso o i le potu mo ma'i tigaina, sosoo ma le ono masina o faamanava i le okesone. Ae te'i lava ua suia atoa lona ma'i, ua te'a le ma'i a ua malosi lelei. Ua faaigoa nei e tagata o lo matou aiga ma tagata lotu i le atunuu atoa sa tatalo mai mo ia, o le "tamameamea o le vavega".

A o o'u matamata ma le toto'a i le polokalame ma le talanoaga o loo fai, ae na ou faaletonu ina ua oo le talanoaga i "agelu tausi" (guardian angels). Na ou faalogo muamua iai o talanoa tagata ma ta'u "agelu tausi", ae na ou talitonu i lea taimi, na o se talitonuga e faavae i luga o ni mea sese, e le sa'o. Ma e faigata lava ona faatalitonuina au i lea mea. Ui lava i lea, sa faaau-au pea ona ou faalogologo ma ou matamata i le faatalatalanoaga.

~~Na uma le polokalame, o'u tago~~

Perseverance

We also rejoice in our sufferings, because we know that suffering produces perseverance; perseverance, character, and character, hope. And hope does not disappoint us, because God has poured out His love into our hearts by the Holy Spirit, whom He has given us.

Romans 5:3-5

atu ua tape le televise ma ou le toe mafaufau iai.

Pe tusa o le masina ua te'a lea talanoaga, a o ala mai la'u tama lea i lana moe, na ma taaalo ai i ana meataalo o tama'i manu e fai i 'ie, o meaalofa na avatu mo ia ina ua fanau mai i le falema'i. Na ma talanoa ma ou fai iai e ese le lelei o tagata ia na foaiina atu ia meaalofa mo ia a o laitiiti lava. Ae te'i ua fai mai, "E ese lo'u fiafia i foma'i ma tausima'i." Ona ou faamatalatalaina lea ia ia, le lelei o le tausiga o ia, ma le alolofa o foma'i ma tausima'i ia ia. Ae te'i ua toe

fai mai, "O le manaia ia o le teine tausima'i lea e fai ona 'apa'au."

Ou te le'i vaai faatasi i se tausima'i, poo se isi teine, o fai ni ona apaau!

E oo mai i le aso, ua le toe maluelueina lo'u talitonu i agelu! Agelu Tausi! Guardian Angels! Aua a gagana mai ai gutu o tama-meamea, e faapefea ona tatou le talitonu iai?

tusia e Kathy Keidel

A o A'u nei, ou te faatuatua i lou Alofa

Pe tusa o le selau tausaga talu ai, na lauga ai se faiaoga ta'uta'ua o le Tusi Paia o Meyer, faasaga i tagata o loo "nonofo i le pefu". O ia ituaiga tagata, sa faaali ni o latou lagona e pei ona faaali e Tavita i le Salamo lenei: "Le Alii e, e te faagalologo pea lava ia te au seia afea? E faavavau?"

Fai mai Meyer e lima ituaiga tagata e nonofo i le pefu: (1) o e talitonu ua tuulafoa'iina i latou e le Atua; (2) o i latou e tuufesili poo fea o taunuu iai a latou tatalo; (3) o i latou ua loto vaivai i avanoa e maua i le olaga; (4) o i latou o loo mafatia i faafitauli tau tupe poo mafatiaga faaletino; ma le (5) o i latou o loo tumau pea i le galuega o fai poo se tulaga faaleaiga ua le mafai ona alu ese ai. A maua se isi i ni mea se tolu o ia mea, ua matua faigata lava.

Afai la o loo maua oe i ni mea se tolu o ia mea, ona tatau lea ona e matua mafaufau lelei i le Salamo lenei e 13. I uluai fuaiupu e lua, o loo faitio ai Tavita; i fuaiupu e lua e sosoo ai o loo tatalo; a o fuaiupu

e lua mulimuli, o loo fiafia ma olioli. Ae oo atu i le faaiuga o le mataupu, ua le toe vaai Tavita ia te ia; a ua faatuatua i le Alii. Ua le o toe nofo o ia i le pefu; ua ia malamalama i le agalelei o le Atua ia te ia. Sa faapea foi ona tautala Paulo e uiga i le Atua ua ia sii a'e tatou mai lo tatou tulaga maualalo, ma faanofo tatou ma Keriso i le lagi; (Efeso 2:6-7): Ua na toe faatutu faatasi mai foi, ma faanonono faatasi i tatou ma Keriso Iesu i mea oi le lagi. Ina ia faaalua i tupulaga atali le silisili ese o le faula'i o lona alofa tunoa, i le agalelei mai ia te i tatou, ia Keriso Iesu.

Aua e te nofo ai pea i uiga o fuaiupu e 1 ma le 2. Vaai a'e i le Alii ma faatuatua ia te ia, o ia na te toe aumai oe i le olioli e masani ai.

Human footprints on the moon will last for millions of years because there is no wind to blow them away.
